

Heiqcuengq Mbaetcaz Riuz Gyae'gyae

Guek raeuz dwg dieg seng mbawcaz, hix dwg dieg cauh vwnzva caz. Ciuq gaujcingq, gij hongsaeh mbawcaz miz cihsaw geiqloeg haenx gaenq miz song cien lai bi lizsij lo. Heiqmbaetcaz dwg caz vwnzva ndawde duj va lwenqda ndeu, de dwg vunz guh hongsaeh caz le gag cauh baenz ndaej riuz roengzdaeu, yungzhab diuq foux, ciengq heiq doengh gij yisuz yenzsu neix, dwg cungj biujyienj vunz ndawbiengz gig gyaezmaij ndeu. De youq ranghdieg Gyanghnanz caeuq Lingjnanz mbangi swngj gih gig riuzhengz. De cungjloih gig lai, lumj fuk veh caenliklik gak dieg, moix cungj cungj gig miz deihfueg daegsaek. Youq Gvangjsih, Nanzningz Yunghningz、Gveilinz、Fangzcwngzgangj、Hocouh Bazbu、Yilinz Bozbwz daengj dieg cungj miz heiqmbaetcaz. Gyoengq heiq de yungzhab dangdieg fungsug, yienjok gij daegsaek deihfueg, gij biujyienj de youh angq youh sengdoengh, vunzlai haengj dangqmaz.

Nanzningz dwg gizdieg lajmbwn ceiq gyaез eu fwen, Yunghningz dieg youq baih doengnamz Nanzningz, gizneix cienzswnj vwnzva ciengq heiq hix gig fungfouq. Yunghningz heiqmbaetcaz Bouxcuengh、Yunghningz bet yaem Bouxcuengh doengh gijneix deng vunz senj dieg、vwnzva doxgyau daengj yingjyangj, cugciemh bienqbaenz cungj heiq gig miz daegsaek dangdieg, gyoengqde dwg gij heiq vwnzva yungzhab yawj ndaej raen haenx.

Ciuq cienznaeuz, Mingzdai geizbyai Cinghdai geiznduj, Yunghningz Nazlouz Cin Nazliengz Cunh Bonazmungz aenvih diegnamh oembiz, mbwn raeuj rumz swnh, yinx mbouj noix minzczu senj daeuj neix youq. Bouxgun singq Ningz daj Guengjdoeng senj daeuj, caeuq Bouxcuengh singq Dwngz daj Nanzningz Si Hinghningz Gih Hajdangz Cin senj daeuj haenx doengzcaemh youq neix youq, hawj Heiqmbaetcaz Bouxcuengh Yunghningz cungj vwnzva Lingjnanz daegbied neix ndaej sengbaenz.

Bonjheiq Heiqmbaetcaz Bouxcuengh Yunghningz ciengq haenx cungj dwg gaengawq beksingq gwndaenj daeuj raiz, aeu heiq daeuj gangj ok vunz Bouxcuengh mbouj hawj apbik、yaek aeu coux haq gag guhcawj、gouz aeu gwn van youq ndei vuenyungz gvaq saedceij, doiq coihawj vunzlai gaenxguh caux gyaranz miz goengrenz youqgaenj. 2010 nienz, Heiqmbaetcaz Bouxcuengh baengh gij ndeiraeuh daegbied de, ndaej lied haeuj aen mingzloeg feihvucziz vwnzva yizcanj daibyaujsing

hanghmoeg gaep swcigih buек daihsam, baenz gij dijbauj minzczu vwnzva.

Yunghningz Gih Nazlouz Cin Nazliengz Cunh Bonazmungz dwg diegdeih henhoh、cienzswnj Heiqmbaetcaz Bouxcuengh. Cungj heiq neix vunz dangdieg cibfaen maij, gyoengqde gag rib ngaenz laebguh heiqdonz heiqmbaetcaz, gag biensij bonjheiq、nda daiz baizlien, miz vunz cingj bae yienjheiq le lij ciengzciengz bae gaenhyawj yienh-gih yanghcin haeuj mbanj bae yienj.

Heiqmbaetcaz Bouxcuengh Yunghningz biuj-yienj dwg ciengq go diuq foux guhcawj, lij gig haengj hagsib mbaet aeu heiq gizwnq gij ndei de, gij ndei de gij fwen ndei diegwnq gyoengqde cungj gig gyaез dawz daeuj yungzhab biensij. Gij fwenbaiz de lai cungj lai yiengh, saekseiz sekrwenz sisi, saekseiz ciengq vaiq vuedbued, miz fwengaicaz、fwenhoengzva、fwenbouxjai、fwenseiqbingz daengj 50 lai cungj ciengqfap.

Boux daibyauj cienzswnj Heiqmbaetcaz Bouxcuengh、boux donzcangj Heiqdonz Heiqmbaetcaz Nazmungz Dwngz Swhdui naeuz: “Danghnaeuz youq ndaw mbanj biujyienj, dou couh aeu Vahcuengh ndaw mbanj daeuj ciengq, vunz-mbanj cungj rox dingq. Bae gizwnq biujyienj ne, dingzlai dwg aeu Begvah ciengq, saekseiz hix aeu Vahgveiliuj ciengq.”

Gij heiqmoeg Heiqmbaetcaz Bouxcuengh Yunghningz dingzlai dwg heiq cienzdoengj, aeu gij gojgaeq ndawbiengz ndeidingq haenx guh maesienq, doenggvaq fwenbaiz mbaetcaz daeuj ciengq, dwg heiqangq、heiqnauh lai, haeuj loih “heiq sam siuj”, couhdwg siujseng、siujdan、siujcouj, hix heuhguh “ban sam gak”.

“Dou baeznaengz yienj Heiqmbaetcaz Bouxcuengh, neiyungz dwg gangj vunz biengz fanjdoiq funghgen maezsaenq, ngah aeu coux haq gag guhcawj, haemq depgaen, vunz raeuz gvaq ndwenngoenz, vunzlai gig maij.” Dwngz Swhdui naeuz.

Heiqmbaetcaz Bouxcuengh Yunghningz gij yozgi buenx roq buenx danz haenx gig lai, aeu gij yozgi roq guhcawj, bauhamz aen laz、aen gyong、aen caz、aen cemqcemq、aen moegnawz daengj cib lai cungj, lai cungj yozgi roq danz yiengjihunghung, gig nauhyied. Linghvaih lij aeu loxlez、aen dig daengj daeuj boq dem, hawj biujyienj gig miz yinhfeih. Bouxyienj ndaw fwngz dawz beizva、gaenfwngz、diuzbien doengh gij doxgaiq neix

vadvvdvwd, doxboiq doxhab, youq gwnz daiz doq ciengq doq diuq, yienj ndaej caenlili.

Gij buhheiq gyoengqde dwg gaengawq yienj gij gaksak ndaw heiq daeuj dapboiq, yienj gijmaz gaksak couh boiq gijmaz buh. Gyoengqde lij rox yawj boux yienj beizsingq daegdiemj daeuj faenboiq gaksak, hawj boux yienjheiq yienj ndaej lumj caen nei.

Ciengz Heiqmbaetcaz Bouxcuengh Yunghningz ndeu aeu yienj daihgaiq 4 aen cungdaeuz. “Yaek biujyienj, gyoengq bouxyienj aeu haeujsim cingsaenz; mwh hwnjdaiz yienj, mbouj ndaej dingzgaz hawj daizheiq dinghcaem, aeu hawj bouxngonz raen ndei ngonз cij ndaej.” Dwngz Swhdui naeuz, de maqmuengh heiqdonz yienj heiq ndei hawj daihgya yawj.

Dwngz Swhdui dauqngeix, Heiqmbaetcaz Bouxcuengh Yunghningz hwngfat daemdengj lailai. De daj 1980 nienz ciep aen rap neix roengzdaeu, daengz daih de gaenq cienzswnj bet daih lo, aenvih gak cungj yienzaen, aen doi, de deng sanq lo. Daengz 2002 nienz, vunzmbanj iugouz le, heiqdonz heiqmbaetcaz cij caiq laebguh gvaq.

Seizneix Heiqdonz Heiqmbaetcaz Bonazmungz miz 22 vunz, bi’ndwen 32 daengz 65 bi baedauq. Gyoengqde dingzlai vunz bi’ndwen laux lo, lij youheiq mbouj miz dieg baizlien, mbouj miz ngaenz baizlien yienjheiq dem.

“Seizneix dou dwg ciq aen dieg cunhvej daeuj baizlien, ngaenz dwg dou dangq boux dangq rib, bae biujyienj ndaej ngaenz ma, cungj dwg dawz daeuj cawx daugi caeuq buhheiq.” Dwngz Swhdui lwnhnaeuz gij gannanz seizneix.

“Gou siengj rag bouxcoz lai di haeuj heiqdonz daeuj, hawj gyoengqde cienzswnj. Naeuz yaek daj lwgnyez guh hwnj, hoeng gou cix caengz ndaej haeuj hagdangz bae lwnhgangj gvaq.” Gangj daengz cienzswnj Heiqmbaetcaz Bouxcuengh, Dwngz Swh-dui nyinhnaeuz rag bouxcoz haeujdaeu, caeuq guh gig youqgaenj. Seizneix yienznaeuz haujai bouxcoz ok rog dajgoeng, hoeng hix miz mbangj bouxcoz siengj gyahaeuj donzdoi daeuj, doiq cienzswnj cungj heiq neix, de naeuz miz saenqsim bw.

Dwngz Swhdui lij maqmuengh miz cwngecwz bangfuz, ndaej gaijgez gij gannanz seizneix bungzdaengz haenx, hawj boux yawj Heiqmbaetcaz Bouxcuengh engq lai, gag rox de, gyaез de, hawj Heiqmbaetcaz Bouxcuengh yied riuz yied gyae.

(Vuz Yaujyij)

Iwnh denjciз minzczu vunz noix Gvangjsih

Gij Daegsaek Sawgeq Sawcih Minzczu Vunz Noix

□Vangz Gyanghmyauз hoiz

Haj、Dingzlai sanq youq ndawbiengz, dingzlai mbouj rox bouxlawz dwg bouxsij bouxcou

Sawgeq cihsaw minzczu vunz noix Guengjsae riengz vunz youq gak dieg riuzcienz, miz gij daegdiemj mbangjdi doxcomz、dingzlai faensanq, couhdwg mbangj noix comz souyo youq gak gaep duzsuhgvanj、bozvuzgvanj、gohyenz gihgou doengh aen danhvei neix, dingzlai faensanq yo youq ndawbiengz gak minzczu vunz noix, cujyau dwg bouxvunz ndaw mbanj gak minzczu vunz noix (lumjbaenz goengmo、goengsae、goengdauh、canghfwen、gak loih bouxcienzswnj minzczu vunz noix caeuq bouxyaезmaij) souyo. Daj aen gvanj souyo ndaw dangjan daeuj yawj,

gak minzczu、vwnzboz、duzsuhgvanj、gauhyau sou sawgeq minzczu vunz noix Guengjsae gyawj 1.5 fanh cek (gienh). Ndawde, Swcigih Duzsuhgvanj souyo 1488 cek(gienh), Cunghgoz Minzczu Duzsuhgvanj souyo 250 cek (gienh), Gvangjsih Saujsu Minzczu Gujciz Baujhu Yenzgiu Cunghsinh souyo 1.2 fanh cek(gienh), Cunghyangh Minzczu Dayoz Bozvuz-gvanj souyo 425 cek(gienh), Gvangjsih Minzczu Bozvuzgvanj souyo 200 cek(gienh) daengj. Daj ndawbiengz sanq yo daeuj yawj, gaengawq Gvangjsih Saujsu Minzczu Gujciz Baujhu Yenzgiu Cunghsinh daj 2014–2016 nienz cujciz cazyawj sawgeq minzczu vunznoix daengx gih, sam bi ndawde gungh cazyawj caemhcai, daenggeiq ndawbiengz

sanq yo gak loih sawgeq minzczu vunz noix 39678 cek(gienh). Aenvih cujyau comz youq Namzningz、Liujcouh、Laizbinh、Baksaek、Hozciz、Cungzcoj roek aen si vunz Bouxcuengh comzyouq haenx cazyawj, mbouj ndaej caz doh daengx gih, dingzlai si、yen、yanghein、mbanj gyok caz mbouj daengz. Vihneix, duenhdingh dangq-naj gak loih sawgeq minzczu vunz noix Guengjsae sanq yo youq ndawbiengz ceiq noix miz 10 fanh cek(gienh).

Gij gisuz yaenq saw gvangqlangh doihengz, sawj yienghsik sawgeq cugbous dinghyien, moix cungj bonj gaekyaenq cungj miz biensaw daejlaeh、cohsaw、moegloeg、si、baz、gienjbaez daengj gveihfan. Hoeng sawgeq cihsaw minzczu vunz noix, mboujlwnh dwg ndaw gvanj souyo

daenggeiq youq ndaw dangjan, roxnaeuz dwg sanq yo youq ndawbiengz, cix mbouj miz daejlaeh gezgou gveihfan, giepnoix ceksaw gak cungj yausu, lumjbaenz ca mbouj lai cungj dwg mbouj miz bouxsij roxnaeuz bouxbien, mizmbangj engqlij cohsaw、bouxcausij hix mbouj miz. Daj neix hix yawj ok bouxyungh、bouxcienzswnj sawgeq cihsaw minzczu vunz noix cungj dwg doenghboux vunz bingzciengz, gyoengqde caeuq bouxcausij、bouxsoyo ciennieb mbouj doengz, ndigah ciengzciengz cij gaengawq swheij yawj ndaej daengz roxnaeuz ngoenznaengz aeuyungh daeuj causij、cienzswnj, miz gij goengyungh gig saedcaih, mbouj haeujsim gij banjbonj gyaciz caeuq lizsij gyaciz de.